

Il peschs da Segl na sa laschan betg pigliar

Studi davart ils peschs en 26 lais alpins

■ **(anr/vi) Il Lai da Segl ed il Lago di Poschiavo èn anc adina attractivs per la pestga. Omadus lais contegnan pliras sorts salmonids. La diversidad è dentant sa sminuida perquai ch'ins ha mess ora sorts estras. Quai demussa in studi.** «La diversidad istorica è vegnida influenzada ferm entras l'import da sorts da peschs ord auters intschess», ha communitgà ier l'Institut federal per la protecciun da las auas. Mess ora han ins cunzunt il salmelin da lai, il salmelin canadais e la

litgiva d'ual che derivan d'auters intschess.

Analisis geneticas han mussà ch'ils peschs esters èn sa cruschads cun ils indigens e che la biodiversidad va tras quai a perder.

Ultims exemplars da duas sorts

«Uschia ha l'antier salmelin dal Lago di Poschiavo pers per gronda part sia atgnadad», scrivan ils perscrutaders. «E da la litgiva marmorisada e da la forella d'Adria

han ins mettain chattà ils ultims exemplars.»

I dat dentant er ina novitad legraivla: En il Lai da Segl ha la populaziun indigena da litgivas – l'uschenumnà salmo labrax – apaina pudì sa dustar malgrà ch'ins ha mess ora la litgiva atlantica. Il salmo labrax n'existia uschiglio nagliur en Svizra.

Autras disas da mangiar

Ord vista dals pestgaders è la pestga da salmelins da lai ida enavos ils ultims onns

a Segl. En il Lago di Poschiavo è la pestga dentant s'augmentada: Oz piglian ins tschintg giadas dapli salmelins en il Puschlav che a Segl.

Il perscrutaders han perquai vuli chattar ora nua ch'ils salmelins sa trategnan. Pescas sistematicas cun la rait han mussà che la spesezza da salmelins è tuttina gronda en il Lai da Segl sco en il Lago di Poschiavo. Il peschs sajan era presapauc tuttina gronds. «Ins sto perquai parter da quella ch'igl è pli grev da pigliar il peschs en il Lai da Segl che quels en il Puschlav»,

scrivan ils perscrutaders. La raschun sajan forsia differentas disas da magliar.

Tranter il 2010 ed il 2014 han ins examinà en tut 26 lais alpins ed inventarisà passa 60 sorts peschs. In team da perscrutaders internaziunals ha fatg ils studis sut la direcziun da l'Institut federal per la protecciun da las auas. En collavuraziun cun l'Uffizi da pestga grischun han ins perscrutà il Lai da Segl e da Poschiavo.

Il 27 da mars a las 19.00 vegnan ils resultats dal studi preschentads en l'auditori da l'Academia Engiadina a Samedan.



La tipica litgiva dal Lago di Poschiavo è sa cruschada cun sorts estras.



MAD La litgiva marmorisada stat en privel da svanir.